

Valentin Hendry (1926 - 2002)



Scriver enzacons plails sur fossa da Valentin Hendry fuss ton sco da tschintschar siper las preits. Tgi legess enzatgei sur dad in nunenconuschen, in Valentin Hendry? Veramein, nus schevan semplamein Tin caliger, e tut saveva tgi ch'ei era manegiau.

Lein schar suandar enzacons tiarms e datums:

Il Tin ei naschius ils 9 da settember 1926 giu Surrein. El ei carschius si cun otg fargliuns, ha visitau las scolas

a Sedrun e lu empriu da calger tier siu bab. Denteren eis el aunc staus zatgei pauc ad alp. Suenter la mort dil bab han ils treis frars Baseli, Leci e Tin surpriu il menaschi puril. Ils treis han fatg il pur alla moda tradiziunala e luvrau quasi tut a maun. E lu co? Tut era schuber, exact e bein fatg. Per finir fuss ei aunc da numnar ch'il Tin ha passentau ils davos onns en casa s. Vigeli ed ei morts ils 8 da november 2002.

Quei sa struschamein esser tut. La veta dil Tin ha giu bia dapii cuntegn. El ha buca recaltgau arbagias cun uffecis, tetels e honurs. Il Tin ei staus in carstgaun beinvulent ed ha adina giu peda da segidar nua ch'ei fageva basegns. El ei staus mudests, ha luvrau per ina paghetta ed in Dieus paghi. Cun siu frar Vigeli ha el fatg biars onns la piazza da glatsch ed els dus capevan da trer si in glatsch neidi ed uliv. Entras il sport da curling han ei era empriu d'enconuscher numerus hosps ed els eran buca pauc loschs cun lur glatsch ed il tetel dad «Eismeister». Ei tucca aunc da far menziun digl uffeci ch'il Tin ha surpriu pil generalessier fagend onns en ed onns ora il caluster da s. Antoni.

Enzaco ha il Tin fascinau mei. El haveva adina buna luna ed ins steva sgarscheivel bugen entuorn el. Nunemblideivlas regurdientschas dil temps da scola vegnan endamen. Il pli bugen havevan nus cu il Tin steva la primavera cun nus buobs enta Par-datsch e pertgirava cun nus la muaglia. Ei era variont e tuttina fagevan nus bein nies pensum pertgei il Tin capeva nus. Nus buobs seregurdein era bugen dil temps en siu luvratori. Cun nus era el aparti buns e nus havein giu bia legher en buda veglia. La buda dil Vigeli e dil Tin era nies liug da sentupada, nies local da giuventetgna. Stediamein havein nus entardau ils calgers, fatg stuccas e giu risadas. Ils dus frars eran vers meisters en lur professiun e reparavan ils menders donnas vid nos calzers. E la finala pretendevan ei ina cagna per la lavur da qualitad. «Calger stai vid tiu laisch»,

schevan ei pli baul ed il Tin ha teniu plaid. Cun siu frar Vigeli ha el fatg il calger ed el ha teniu la dira tochen igl onn 1995. Fernando Jacomet ha regalau sils 70 dil Tin ina stupenta poesia. Ina part da quella duei far honur al davos calger tuatschin.

Naven da Bugnei entochen Tschamut
Tut enconuschev'il calger da Maunsut.
En buda anflavas el legherss cuntents
Pinond calzers jasters ed è indigens.

Pinau e cusiu cun plascher ed inschign
Da tut il models, calzers-dama perfin.
Siu survetsch e lavur mintgin ha duvrau
Per breigias e stentas lein ver engraziau.

Da Surrein a Sedrun las Taviarsas sbargata
Biars onns nies calger, meinsvart via schliata.
Tgisa contas gadas en quels curont'onns
Vi e neu eis vegnius da vent e stempbau.

Ils treis da mars 95 ha'l luvrau siu davos di
Tin Hendry calger nossa Val ha buc pli.
Mistregn e mistergner ei svanius ord la Val
Regurdientscha preziosa resta aunc ual.

Ed ussa ha el buca mo remess siu mistregn, el ha era bandunau per adina nossa cuminsonza. Il Tin ha viviu ina veta sempla e tuttina schau anavos valurs cuzzontas che biars da nus san appreziar. Lein esser engrazieivels cun recitar mintgaton in ·Ruaussa en pasch, car Tin!»

Beni Hendry